



Sesida dals

21 d'october 2024

Communitgà ils

25 d'october 2024

Protocol nr.

833/2024

Dumonda Danuser (Cuira)

concernent la prevenziun d'opiniuns misantropicas en la lavur cun giuvenils

Resposta da la Regenza

En il chantun Grischun ha la prevenziun d'ostilitad envers gruppas da persunas lieu en spezial en las scolas. Ultra da l'instrucziun tras las persunas d'instrucziun, organisescha la Polizia chantunala dal Grischun pliras lecziuns da prevenziun durant il temp da scola obligatoric. L'Uffizi chantunal dal servetsch social sustegna las vischnancas, las organisaziuns e las persunas spezialisadas en collavuraziun cun la federaziun da tetg jugend.gr areguard la promoziun d'uffants e da giuvenils sco er areguard il svilup da purschidas per giuvenils. Sut quest aspect e resguardond las posiziuns dals posts da servetsch involvids ston las singulas dumondas vegnir respundidas sco suonda:

Tar la dumonda 1: En il studi da giuventetgna menziunà èsi vegnì constatà, che la quota da giuvenils che han ina tenuta negativa envers las minoritads socialas saja s'augmentada durant ils ultims onns. Ina midada negativa sa mussia cunzunt tar giuvenils pli giuvens, tar giuvenils masculins e tar giuvenils che na fan betg part d'ina uniun u d'ina organisaziun. Ils auturs dal studi han preschentà intginas tesas per l'augment observà, els han dentant il medem mument menziunà, che las explicaziuns pussaivlas stoppian vegnir examinadas tras ulteriurs studis. Ultra da quai concedan els, ch'il studi saja suttamess a differents factors limitants sco per exempel ad ina bassa quota da respostas.

Tar la dumonda 2: La Regenza na vesa nagin basegn d'agir supplementar en quest connex. En il senn da la prevenziun vegnan ils temas menziunads prendids per mauns en moda multifara en il Plan d'instrucziun 21 GR. Confurm a la vegliadetgna s'occupan las scolaras ed ils scolars sin ils differents stgalims da scola cun ils temas. Er suenter il temp da scola obligatoric vegnan ils temas menziunads tractads vinvant en las scolas professiunalas en il rom da la furmaziun professiunala da basa. Las collavuraturas ed ils collavurats dal post spezialisà Prevenziun da la Polizia chantunala dal Grischun instrueschan dapi intgins onns en tut il chantun ultra da l'instrucziun da traffic er en il sector da la prevenziun da la criminalitad tar la giuventetgna. Perquai ch'ins collavura fitg stretgamain cun ulteriurs posts da prevenziun chantunals, vegn questa instrucziun fatga integrond champs problematic actuals.

Uschia vegn per exempel instruì sut l'aspect, che giuvenils d'aventan pli e pli baud chastiabels, dapi l'onn da scola 2023/2024 il tema principal «cybermobbing» gia en la 6. classa primara. Er vegnan tematisads temas sco ostilitad envers Muslims, ostilitad envers persunas estras, omofobia ed antisemitissem. Durant l'onn da scola current 2024/2025 vegn tematisà il «ir enturn cun medias digitalas» en las classes dal stgallim superiur sco part integrala da las lecziuns d'instrucziun «Radicalisaziun ed extremissem. Tge è quai?». A las scholaras ed als scholars vegn mussà in video explicativ da la Prevenziun svizra da la criminalitad (PSC): Radicalisaziun ed extremissem. Tge è quai? (da chattar sut www.YouTube.com) . Ultra da quai pon las scolas consultar las specialistas ed ils specialists da prevenziun e dumandar sustegn en cas da problems specifics.

Tar la dumonda 3: Per la lavur da giuventetgna e per la lavur sociala da scola èn cumpetentas las vischnancas. Quant enavant che las vischnancas han mess in accent specific sin ils temas da la radicalisaziun/prevenziun, n'è betg enconuscent a la Regenza. Tras l'incarica da prestaziun a jugend.gr metta il chantun a disposiziun cussegliaziun e sustegn davart differents temas da la promoziun d'uffants e da giuvenils sco er davart il svilup da purschidas per giuvenils. En quest connex èn decisivs ils princips fundamentals da la lavur averta cun uffants e cun giuvenils – particularmain avertadad, voluntariadad, participaziun, respect e cunfins. 74 % da las vischnancas han fatg diever ils ultims onns da la purschida da cussegliaziun da jugend.gr.

Tar la dumonda 4: Projects da prevenziun d'auters chantuns han savens er lieu en il context da scola. Ina prevenziun cumplessiva per rinforzar las cumpetenzas necessarias po vegnir realisada mo en la scola. Quai è relevant en spezial sut l'aspect, che la quota da persunas cun tenutas ostilas crescha – tenor il studi da giuventetgna numnà en la dumonda – gist tar giuvenils pli giuvens e tar giuvenils che n'han nagina colliaziun sur uniuns. L'Inspecturat da scola da l'Uffizi per la scola populara ed il sport vegn a sensibilisar durant l'onn da scola current tut las scolas per las directives dal plan d'instrucziun areguard l'ostilitad envers Muslims e persunas estras, l'omofobia e l'antisemitissem. Durant ils curs per furmaturas e furmaturs professionals vegnan er las persunas da la furmaziun professiunala sensibilisadas en il rom da lur obligaziun d'assistenza davart ils temas menziunads. Actualmain n'è cumprovà nagin basegn d'agir.



En num da la Regenza

Il president:

Dr. Jon Domenic Parolini

Il chancelier:

Daniel Spadin